


内閣文庫		
番號	漢	3299
冊數	6	(5)
函號	310	1



意令凡夫實證故問曰於凡夫而能實證也。餘經嘗言之乎。曰蓋嘗言之。維摩經曰亦不滅受而取證者。即於此身證也。法華經曰父母所生清淨肉眼見於三千大千世界者。即於此生證也。圓覺經曰一切衆生皆證圓覺者。不獨此身此生能證。一切衆生蓋皆已證也。雜華曰少作功德力疾成菩提。馬鳴曰若有衆生能觀一切妄想無相。則爲證得如來智慧。夫以一切衆生皆已證者。以少方便與能觀妄念。便成菩提。便證如來智慧。則知凡聖一真。俱存見隔。見存即凡。情忘即佛也。補

一
日
一
書

法華經

日五辛者入楞伽經曰葱蒜韭薤興渠也應法師
曰興渠正云興宜慈憫三藏曰根如蘿蔔出土辛
臭以冬到彼土不見其苗故不緒此方以胡荽稱
之八棄者比丘四波羅夷尼復加四也義無正譯
但喻如死屍衆所不受故曰棄

阿難是善男子欲愛軋枯根境不偶現前殘質不復
續生執心虛明純是智慧慧性明圓鑿十方界乾有
其慧名乾慧地欲習初乾未與如來法流水接即以
此心中中流入圓妙開敷從真妙圓重發真妙

論曰欲滅盡妄想入中道純真之信必先以空假

中三法觀一切法於此言欲愛者自姪機而觀者
也根境不偶而欲愛乾枯假也執心虛明而慧性
發現空也即以此心中中流入中也有空有假以
顯中故而以此中至中道純真之信故曰中中也
寶積曰文殊師利曰天子若人一心專精自受貪
欲心發即應覺知方便散除還令寂靜云何散除
應作是念此是空此不淨求此欲心生處滅處從
何處來去至何所其中誰染誰受誰爲染者誰爲
染法如是觀時不見能染不見所染不見染事以
不見故則無有取以不取故則無有捨以不捨故

則無有受不捨不受則名離欲寂滅涅槃言圓妙
開敷者空假中三法具也如圓伊三點如摩醯首
羅三目也從真妙圓者觀成之名故於方入觀則
曰圓妙於觀成則曰妙圓重發真妙者中道純真
者也

妙信常住一切妄想滅盡無餘中道純真名信心住
真信明了一切圓通陰處界三不能爲礙如是乃至
過去未來無數劫中捨身受身一切習氣皆現在前
是善男子皆能憶念得無遺忘名念心住妙圓純真
真精發化無始習氣通一精明唯以精明進趣真淨

名精進心心精現前純以智慧名慧心住執持智明
周徧寂湛寂妙常疑名定心住定光發明明性深入
唯進無退名不退心心進安然保持不失十方如來
氣分交接名護法心覺明保持能以妙力迴佛慈光
向佛安住猶如雙鏡光明相對其中妙影重重相入
名迴向心心光密迴獲佛常疑無上妙淨安住無爲
得無遺失名戒心住住戒自在能遊十方所去隨願
名願心住阿難是善男子以真方便發此十心心精
發輝十用步入圓成一心名發心住心中發明如淨
瑠璃內現精金以前妙心履以成地名治地住心地

涉知俱得明了、遊履十方、得無留礙、名修行住、行與佛同、受佛氣分、如中陰身、自求父母、陰信冥通、入如來種、名生貴住、既遊道胎、親奉覺胤、如胎已成人、相不缺、名方便具足住、容貌如佛、心相亦同名正心住、身心合成、日益增長、名不退住、十身靈相、一時具足、童真住、形成出胎、親爲佛子、名法王子住、表以成人、如國大王、以諸國事、分委太子、彼刹利王世子、長成、陳列灌頂、名灌頂住、阿難是善男子、成佛子、已具足無量如來妙德、十方隨順、名歡喜行、善能利益一切衆生、名饒益行、自覺覺他、得無違拒、名無嗔恨行。

種類出生、窮未來際、三世平等、十方通達、名無盡行、一切合同、種種法門、得無差誤、名離癡亂行、則於同中、顯現羣異、一一異相、各各見同、名善現行、如是乃至十方虛空、滿足微塵、一一塵中、現十方界、現塵現界、不相留礙、名無著行、種種現前、咸是第一波羅蜜、多名尊重行、如是圓融、能成十方諸佛、軌則、名善法行、一一皆是清淨無漏、一真無爲、性本然故、名真實行、阿難是善男子、滿足神通、成佛事已、純潔精真、遠諸留患、當度衆生、滅除度相、迴無爲心、向涅槃路、名救護一切衆生、離衆生相、迴向壞其可壞、遠離諸離。

名不壞迴向本覺湛然覺齊佛覺名等一切佛迴向
精真發明地如佛地名至一切處迴向世界如來互
相涉入得無罣礙名無盡功德藏迴向於同佛地地
中各各生清淨因依因發揮取涅槃道名隨順平等
善根迴向真根既成十方衆生皆我本性性圓成就
不失衆生名隨順等觀一切衆生迴向卽一切法離
一切相唯卽與離二無所著名真如相迴向真得所
如十方無礙名無縛解脫迴向性德圓成法界量滅
名法界無量迴向阿難是善男子盡是清淨四十一
心次成四種妙圓加行卽以佛覺用爲已心若出未

出如鑽火欲然其木名爲煖地又以已心成佛所
履若依非依如登高山身入虛空下有微礙名爲頂
地心佛二同善得中道如忍事人非懷非出名爲忍
地數量銷滅迷覺中道二無所目名世第一地阿難
是善男子於大菩提善得通達覺通如來盡佛境界
名歡喜地異性入同同性亦滅名離垢地淨極明生
名發光地明極覺滿名燄慧地一切同異所不能至
名難勝地無爲真如性淨明露名現前地盡真如際
名遠行地一真如心名不動地發真如用名善慧地
阿難是諸菩薩從此已往修習畢功功德圓滿亦目

此地名修習位、慈陰妙雲、覆涅槃海、名法雲地、如來
逆流、如是菩薩順行而至、覺際入交、名爲等覺、阿難
從乾慧心、至等覺、已、是覺始獲、金剛心中、初乾慧地
如是重重單複十二方、盡妙覺成無上道、是種種地
皆以金剛觀、察如幻十種深喻、奢摩他中、用諸如來
毘婆舍那清淨修證、漸次深入阿難、如是皆以三增
進故、善能成就五十五位、眞菩提路、作是觀者、名爲
正觀、若他觀者、名爲邪觀

論曰、三世如來、付授一切菩薩修證法式、銓量淺
深、力用分別地位等差、始自十信、然以爲信者、尚

屬生滅、故當住心、乃立十住、又以爲住者、缺資發
方便之用、故成行心、乃立十行、又以爲行者、蓋自
利、未有以及衆生、故施迴向、乃立十迴向、自十信
而至住、不迴向者、三賢位也、又自三賢、卽登初地、
以大慈大悲、發生資養、茂益成就之故、有地名於
初地方、曰證無生法忍、乃至十地之終、鍊磨餘習
之効、與本覺眞如相等、故名等覺、如易曰、窮神知
化者也、至入妙覺、則一而已、無有等相、如但曰神
也、此經特異於此、於十信之前、加乾慧地、於十地
之前、加煖頂忍世第一地、於妙覺前、加金剛乾慧

地非特然也。雜華於十住曰：證無生法忍。諸經於十地曰：證無生法忍。諸經未暇論雜華號一佛乘教。然證無生法忍尚在五十五數之中。世尊於此乃曰：立三漸次證無生法忍。三漸次蓋方便安立者。出於五十五數之外者也。世尊之意蓋欲示從凡夫能實證之法故也。佛陀此云覺。此方則天民之先覺者也。而世尊於信住行向十地等妙之外立三漸次證無生法忍者。成佛之要訣如此耳。嗚呼。世尊之恩可謂不貲矣。故曰：如是以三增進故善能成就五十五位真菩提路。問曰：乾慧地、金剛

乾慧心何以分。曰：皆曰乾慧地。皆曰乾慧心也。故於初乾慧地。又曰：阿難從乾慧心至等覺已也。於中又曰：始獲金剛心中初乾慧地也。至等覺已欲盡妙覺故。須獲金剛心壞滅前地向。以未與如來法流水接。故名乾慧。今入覺地。未能入佛妙莊嚴海。故復名初乾慧地也。又問：何謂十種深喻。曰：應觀一切業如幻。一切法如燄。一切性如水。中月妙色如空。妙音如響。諸佛國土如乾闥婆城。佛事如夢。佛身如影。報身如像。法佛如化。何則。不可取捨一切空故。若但如金剛般若觀有為法如幻如夢。

非深喻也。深入此空，乃名實相。此非作法無滅壞，故若異此觀，卽生滅法。唐僧澄觀作地住修證偈曰：修習空華萬行，宴坐水月道場。降伏鏡象天魔，證得夢中佛果。補曰：如來證真寂法界，一如已見諸衆生理體無二，亦皆成佛。次於根本智起後，得智於後得智中，觀諸衆生依前輪迴生死，備受衆苦。於是憶念因中弘誓衆生未度，故哀而愍之。從大悲心示現報化之身，爲諸衆生轉正法輪。謂從真寂界復入生死海中，是爲逆流也。菩薩依如來教導，發起大乘根本信心，次第歷五位修行，至

於等覺，是爲順行也。由此順行，將至等覺，故曰覺際。至等覺已，復修習畢功，將成妙覺位時，於色究竟天上，現大寶華王座，量等百萬阿僧祇三千大千世界。菩薩欲登此座，先於身中出現十道百寶光明，照燭有情。最後從頂門放光，入諸佛足。於是諸佛從面門放百寶光明，流灌此菩薩頂。直至心源，蓋謂師弟子流光交相涉入。故曰入交，是爲覺際入交也。此菩薩與諸如來一切法等，故曰等覺。言從乾慧心至等覺已，是覺始獲金剛心中者，乃標舉菩薩自信住行向地等五位進修之槩畧也。

二楞嚴名義卷八
二
乾慧心卽前乾慧地謂執虛明之心以此爲地但
變其文耳是覺指等覺而言之也謂此菩薩從初
發心歷五位修行至法雲地後前念金剛心中斷
捨有漏善句劣無漏習氣種子四事已成等覺位
也言初乾慧地是如重重單複十二者此通敘菩
薩從初發心歷涉五位因地進修之始末非於金
剛心後重立此乾慧地也謂從初乾慧地如是重
重歷涉五位進修名單十四加行證明得明增印
順及世第一法名複二然此菩薩於五位次第修
行皆以十波羅蜜修習精練斷彼煩惱所知二障

又於五十心中五重修練此十波羅蜜故名重重
於一心中正修一波羅蜜故名單修餘九波羅
蜜隨力隨能故名複言方盡妙覺成無上道者謂
前念金剛心中斷捨四事已後念解脫道中獲得
三種常身四妙圓寂圓滿佛果故也古今諸師於
此箋釋多不能區析反令意義曖昧使學者莫究
歸宿寂音雖立二乾慧地以明此義亦未合本旨
獨長水從阿難至金剛心中爲一科初乾慧地至
方盡妙覺爲一科其理差勝

爾時文殊師利法王子在大衆中卽從座起頂禮佛

足而白佛言當何名是經我及衆生云何奉持佛告
文殊師利是經名大佛頂悉怛多般怛囉無上寶印
十方如來清淨海眼亦名救護親因度脫阿難及此
會中性比丘尼得菩提心入徧知海亦名如來密因
修證了義亦名大方廣妙蓮華王十方佛母陀羅尼
呪亦名灌頂章句諸菩薩萬行首楞嚴汝當奉持

論曰海漩復處曰眼此經名清淨海眼者有淵深
之義輾足無嫌曰親此經又名救護親因者有密
嚴之義生我曰母此經又名佛母者有出生如來
之義王將付世子以位則取海水灌其頂明爲王

當受職也此經又名灌頂者有受職之義也問曰
文殊師利起問世尊此經名字而明解辨行由因
至果顯地位之差別示修證之易難殫盡無餘矣
是法會已終結集者當結之而猶有餘義何也觀
經之意曰汝當奉行則無後段又下文曰如瑠璃
王誅瞿曇族姓則琉璃王乃波斯匿王子也王薨
琉璃方紹位豈此會方與之指河論見而阿難已
引敘其子事乎自是觀之蓋後段乃別時所說特
結集者補續爲一經耳不可不辯也 補曰寂音
以琉璃王誅瞿曇族姓爲證可也以文殊師利起

問此經名字至汝當奉行謂其法會已終不可也
如金剛般若經佛與空生問答未既空生遽起白
佛言世尊當何名此經我等云何奉持佛言是經
名為金剛般若波羅蜜以是名字汝當奉持則亦
法會已終而方談實相蓋世尊於此經雖明解辯
行由因至果顯地位差別示修證易難令末世衆
生超脫見聞明悟如來自到境界入三摩地慮其
不能識辯邪正落於魔道於是攬七寶几回紫金
山再來凭倚普告大衆於禪那現境說五十種魔
最後乃曰此是過去先佛世尊奢摩他中毘婆舍

那覺明分析微細魔事魔境現前汝能諳識心垢
洗除則能超越信住等位入於如來妙莊嚴海又
曰若諸末世愚鈍衆生未識禪那不知說法樂修
三昧汝恐同邪至汝當恭欽十方如來究竟修進
最後垂範又至理則頓悟乘悟併銷事非頓除因
次第盡我已示汝劫波巾結何所不明再此詢問
其詞蟬聯終始無間以此攷之非結集者補續明
矣寂音未詳此經非一時頓說及匿王與佛實同
生年預此法會未幾被癡琉璃王立即誅釋種故
有此辯也此經與涅槃說於十八年中既而入滅

以匿王在會年六十有二證之非一時頓說則可見矣無盡亦未詳二經於二九年中所說欲刪去故文琉璃善星二事甚不察也

說是語已卽時阿難及諸大衆得蒙如來開示密印般怛囉義兼聞此經了義名目頓悟禪那修證聖位增上妙理心慮虛疑斷除三界修心六品微細煩惱論曰十使煩惱小乘次第斷故身見邊見邪見三品在初果地斷見取戒取貪三品在二果地斷瞋癡慢三品在三果地斷於此界以有疑故未名見道然於此乃方斷故金剛般若談四尊者於三者

則曰果於阿羅則曰得阿羅漢道蓋至此果地則無疑矣一切衆生皆由著我故不忘身見命將終時未至昏昧想身見特著彌勒曰未到昏昧想位長時所習我愛現行由此力故謂我當無便愛我身由此建立中有生報若預流果及一來果爾時我愛亦復現行然此預流及一來果於此我愛由智慧力數數推求制而不著猶壯夫與羸劣者共相搆力能制伏之阿難已證二果故曰修心六品也補曰長慶曰俱生煩惱難除故曰微細小乘教三界九地各分九品四四地地別斷初果斷欲

界一地九品中前一品惑證第二果二果斷下三
品證第三果三果斷上二界七十二品卽得羅漢
也餘如寂音之論

卽從座起頂禮佛足合掌恭敬而白佛言大威德世
尊慈音無遮善開衆生微細沈惑令我今日身心快
然得大饒益世尊若此妙明真淨妙心本來徧圓如
是乃至大地草木蟬動含靈本元真如卽是如來成
佛真體佛體真實云何復有地獄餓鬼畜生修羅人
天等道世尊此道爲復本來自有爲是衆生妄習生
起世尊如寶蓮香比丘尼持菩薩戒私行姪欲妄言

行姪非殺非偷無有業報發是語已先於女根生大
猛火後於郎郎猛火燒然墮無間獄琉璃大王善星
比丘琉璃爲誅瞿曇族姓善星妄說一切法空生身
陷入阿鼻地獄此諸地獄爲有定處爲復自然彼彼
發業各各私受惟垂大慈開發童蒙令諸一切持戒
衆生聞決定義歡喜頂戴謹繫無犯

論曰阿難引寶蓮香比丘尼琉璃善星所造之業
問地獄定處然其意猶著姪機之罪故以爲先也
言此妙明真淨妙心本來徧圓如是乃至大地草
木蟬動含靈本元真如卽是如來成佛真體者此

出情之法也。言佛體真實，云何復有地獄餓鬼畜生、修羅、人、天等道者？情中之業也。雜華論曰：情生智隔，想變體殊。如功德林菩薩等十林菩薩所從來國，國亦名慧。一切境界總名慧體，何以然者？無有情無情故，所以然者無二見故。爲一真智境界，無成佛者，無不成佛者，故有情無情者，此是依業說。夫論成佛者，非屬業故；若非屬業者，卽非有情無情故也。何得於出情法上計言有成佛不成佛耶？彼有情此無情者，是業收非佛解脫，豈將自己情業之繫，作如是上量情與非情成與不成哉。

阿難以情中之業難出情之法者也。

佛告阿難，快哉此問。令諸衆生不入邪見。汝今諦聽，當爲汝說阿難。一切衆生實本真淨，因彼妄見有妄習生，因此分開內分、外分。阿難內分卽是衆生分內，因諸愛染發起妄情，情積不休，能生愛水，是故衆生心憶瑣羞，口中水出，心憶前人或憐或恨，目中淚盈，貪求財寶，心發愛涎，舉體光潤，心著行姪，男女二根自然流液。阿難諸愛雖別，流結是同，潤濕不升，自然從墜。此名內分。阿難外分卽是衆生分外，因諸渴仰，發明虛想，積不了，能生勝氣，是故衆生心持禁戒。

舉身輕清、心持呪印、顧盼雄毅、心欲生天、夢想飛舉、心存佛國、聖境冥現、事善知識、自輕身命、阿難諸想、雖別輕舉是同、飛動不沈、自然超越、此名外分、阿難一切世間生死相續、生從順習、死從變流、臨命終時、未捨煖觸、一生善惡俱時頓現、死逆生順、二習相交、論曰、前識爲故習、後識爲新習、是謂二習、問曰、一生善惡何以於此逆順相交時頓現乎、曰、善惡之業如夢、方作夢時、豈能自知是夢、非夢、要須覺時、夢中之事、了然自現、不待尋繹、一生善惡亦復如是、寶積經曰、佛謂淨飯王言、大王耳聞惡聲、生於

惡心、大王如人夢中親愛別離、生大苦惱、悲號啼哭、或離父母、妻子所愛眷屬、是人覺已、憶念夢中親愛別離、悲泣等事、於意云、何夢中所見、是實有否、王言不也、佛言、大王於意云、何是人所夢、執以謂實、是爲智否、王言不也、世尊、何以故、夢中所見親愛別離、畢竟是無、何況悲泣、是人徒自疲勞、都無有實、佛言、大王如是愚癡、無聞凡夫、耳聞惡聲、而生執著、生執著已、起不愛心、以不愛故、生於瞋心、生瞋心故、造作瞋業、所謂身三口四意三種業、造彼業已、即便謝滅、是業滅已、不依東方而住、亦

復不依南西北方四維上下而住如是之業乃至
臨死之時最後識滅見先所作心想中現大王是
人見已心生憂怖自分業盡異業現前大王如所
夢覺念夢中事

純想卽飛必生天上若飛心中兼福兼慧及與淨願
自然心開見十方佛一切淨土隨願往生情少想多
輕舉非遠卽爲飛仙大力鬼王飛行夜叉地行羅刹
遊於四天所去無礙其中若有善願善心護持我法
或護禁戒隨持戒人或護神呪隨持呪者或護禪定
保綏法忍是等親住如來座下情想均等不飛不墜

生於人間想明斯聰情幽斯鈍情多想少流入橫生
重爲毛羣輕爲羽族七情三想沉下水輪生於火際
受氣猛火身爲餓鬼常被焚燒水能害已無食無飲
經百千劫九情一想下洞火輪身入風火二交過地
輕生有間重生無間二種地獄純情卽沉入阿鼻獄
若沉心中有謗大乘毀佛禁戒誑妄說法虛貪信施
濫膺恭敬五逆十重更生十方阿鼻地獄循造惡業
雖則自招衆同分中兼有元地

論曰彌勒曰於欲界中有三十六處謂八大那落
迦何等爲八一等活二黑繩三衆合四號咤五大

號叫六燒熱七極熱八無間此諸大那落迦處廣
十千踰繕那此外復有八寒那落迦處何等爲八
一炮那落迦二炮裂那落迦三郝凡那落迦四郝
郝凡那落迦五虎虎凡那落迦六青蓮那落迦七
紅蓮那落迦八大紅蓮那落迦從此下三萬二千
踰繕那至等活那落迦從此復隔四千踰繕那有
餘那落迦如等活大那落迦處初寒那落迦處亦
爾從此復隔二千踰繕那有餘那落迦又曰於等
活大那落迦中多受如是極治罰苦謂彼有情多
共聚集業增上生種種苦具次第而起更相殘害

悶絕躡地次虛空中有大聲發唱如是言此諸有
情可還等治可還等治次彼有情欬然復起又曰
飲食受用者三界將生已生有情壽命安住此中
當知觸意思識三種食故一切三界有情壽命安
住段食一種唯令欲界有情壽命安住獨大那落
迦受生有情有微細段食謂腑臟中有微風由此
因緣彼得久住餓鬼旁生人中亦有麤段食謂作
分段而噉食之復有微細食謂羯邏藍等位有情
及欲界諸天由彼食已所有段食流入一切身分
支節尋卽消化無有便穢以彌勒所論名目所在

受苦之相所依之食、驗世尊言曰、雖則自招、衆同分中、兼有元地、爲無可疑者、然破色心論曰、如地獄報衆生、以同業故、熱鐵爲地、而獄卒夜叉、閻羅王等、初不與罪苦有情同業、然亦同罪、獄中何也、圓覺經曰、有妄業故、妄見流轉、厭流轉者、妄見涅槃、於是世尊又爲說造十習因、受六交報也、雜華曰、天鼓謂善住天子曰、汝等昔在地獄、地獄及身、非十方來、但由汝顛倒惡業、愚癡纏縛、生地獄身、此無根本、無有來處、補曰、淨土三昧經曰、昔毗沙國王與維陀始王共戰、自惟陣敗、立誓願爲地

下主時、臣佐一十八人、領百萬衆、願頭生角、助王法化、治其罪人、今所謂閻羅天子、牛頭阿傍等是也、然其所居處、如世之棘寺、其獄官獄卒、吏雖與囚徒同一囹圄、而隨業所治、所受之報、則異耳、愚讀破色心論所問、寂音論之未詳、故復出此

阿難、此等皆是彼諸衆生、自業所感、造十習因、受六交報、云何十因、阿難、一者、姪習交接、發於相磨、研磨不休、如是故有大猛火光、於中發動、如人以手自相磨觸、煖相現前、二習、相然、故有鐵牀銅柱之事、是故十方一切如來、色目行姪、同名欲火、菩薩見欲、如避

火坑二者貪習交計發於相吸吸攬不止如是故有積寒堅冰於中凍冽如人以口吸縮風氣有冷觸生二習相陵故有吒吒波波羅羅青赤白蓮寒冰等事是故十方一切如來色目多求同名貪水菩薩見貪如避瘴海三者慢習交陵發於相恃馳流不息如是故有騰逸奔波積波爲水如人口舌自相繇味因而水發二習相鼓故有血河灰河熱沙毒海融銅灌吞諸事是故十方一切如來色目我慢名飲癡水菩薩見慢如避巨溺四者瞋習交衝發於相忤忤結不息心熱發火鑄氣爲金如是故有刀山鐵檝劔樹劔輪

斧鉞鎗鋸如人啣冤殺氣飛動二習相擊故有宮割斬斫剉刺槌擊諸事是故十方一切如來色目瞋恚名利刀劔菩薩見瞋如避誅戮五者詐習交誘發於相調引起不住如是故有繩木絞校如水浸田草木生長二習相延故有杻械枷鎖鞭杖撻棒諸事是故十方一切如來色目姦偽同名讒賊菩薩見詐如畏豺狼六者誑習交欺發於相罔誣罔不止飛心造姦如是故有塵土屎尿穢汗不淨如塵隨風各無所見二習相加故有沒溺騰擲飛墜漂淪諸事是故十方一切如來色目欺誑同名劫殺菩薩見誑如踐蛇虺七者

怨習交嫌發于嗾恨如是故有飛石投礮匣貯車檻
甕盛囊撲如陰毒人懷抱畜惡二習相吞故有投擲
擒捉擊射拋撮諸事是故十方一切如來色目怨家
名違害鬼菩薩見怨如飲鴆酒八者見習交明如薩
迦耶見戒禁取邪悟諸業發於違拒出生相反如是
故有王使主吏證執文籍如行路人來往相見二習
相交故有勘問權詐考訊推鞠察訪披究照明善惡
童子手執文簿辭辯諸事是故十方一切如來色目
惡見同名見坑菩薩見諸虛妄偏執如入毒壑亢者
杜習交加發於誣謗如是故有合山合石碾磴耕磨

如讒賊人逼枉良善二習相排故有押捺檢按威泥
衡度諸事是故十方一切如來色目怨謗同名讒虎
菩薩見枉如遭霹靂十者訟習交誼發於藏覆如是
故有鑒見照燭如於日中不能藏影故有惡友業鏡
火珠披露宿業對驗諸事是故十方一切如來色目
覆藏同名陰賊菩薩觀覆戴高山履於巨海

論曰滔天之浸出於涓滴岑樓之木發於毫末者
其始於甚微而終於不可禦故聖人於所習多慎
之問曰何以有習曰覺性無性故以無性故隨所
熏而起甚矣習性之難除雖親奉世尊如阿難者

有姪習於說法會中嘗諦視女人如畢陵迦婆蹉
有慢習呼恒河神女爲小婢神女訴於世尊世尊
曰當向神女懺悔於是畢陵迦婆蹉呼曰小婢容
我悔過阿難依近慈光猶諦視女人畢陵迦婆蹉
親受明誨然猶呼神女以爲小婢是皆果位中聖
人者且折伏姪慢之習無功如此況一切衆生乎
言習者謂姪貪慢瞋詐誑怨見枉訟也是十法三
毒之別相及等分相以此經專治姪機故又冠其
習於十法之首言一切如來色目者猶言以姪爲
何等品類以貪爲何等品類以慢爲何等品類以

瞋爲何等品類以詐爲何等品類以誑爲何等品
類以怨爲何等品類以見爲何等品類以枉爲何
等品類以訟爲何等品類也而姪本爲熱惱故世
尊目爲火非特世尊雖十方如來亦以爲火也而
其下九法號十方如來色目者亦爾然因有二其
一曰正發業卽無明其二曰助發業卽餘惑俱生
分別也今除姪習是所發之業餘九皆是能發業
之惑也如姪研磨不休自耗其精則火界熾然於
其生也尚有消渴內熱癰疽等疾則其死也見大
猛火固其所也銅柱鐵床則是其抱持寢卧堅覺

妄想餘習、姪以磨生火、則貪以吸生水、亦固其所也。此與陽盛夢火、陰盛夢水、亦無以異。雖彼以是復我、然我所見、非彼所成。皆以我所習起。故問曰：何謂吒吒波波羅羅耶？曰：俱舍論曰：波波吒吒羅羅寒者、聲相如此。青赤白蓮寒者、色相如此。彌勒論曰：有青蓮那落迦、紅蓮那落迦者。此也。問曰：前言姪習以熱惱、故爲火。今言瞋習亦曰心熱、發火。何也？曰：瞋能起陽於五性、屬木。木起陽則發火。火克金、則鑄氣氣。雖屬金、要待火力成體。又從火革、乃能爲傷物也。問曰：慢習爲癡水、何物耶？曰：西國

有此水、如此土、炎荒瘴泉、飲者卽瘖。謂之啞瘖類也。又問曰：詐習而成、杻械枷鎖、鞭杖撻棒、誑習而成。屎尿穢汗不淨、何也？曰：以姪習而成。銅柱鐵牀、以貪習而成。青赤白蓮寒、冰等事、復何恠哉耶？補曰：宮割、五刑之一也。校枷也。易曰：履校滅趾。荷校滅耳。囊撲者、以囊貯人而撲殺之也。史記秦始皇囊撲兩弟。薩迦耶、具云薩迦耶薩。此云身見戒。謂執身有我戒也。禁取謂非因計因、如持牛狗等戒、爲生天因也。

云何六韋阿難、一切衆生、六識造業、所造惡報、從六

根出云何惡報從六根出一者見報招引惡果此見
業交則臨終時先見猛火滿十方界亡者神識飛墜
乘烟入無間獄發明二相一者明見則能徧見種種
惡物生無量畏二者暗見寂然不見生無量恐如是
見火燒聽能為鑊湯洋銅燒息能為黑烟紫燄燒味
能為焦丸鐵糜燒觸能為熱灰鑪炭燒心能生星火
迸灑扇鼓空界二者聞報招引惡果此聞業交則臨
終時先見波濤沒溺天地亡者神識降注乘流入無
間獄發明二相一者開聽聽種種鬧精神愁亂二者
閉聽寂無所聞幽魄沈沒如是聞波注聞則能為責

為詰注見則能為雷為吼為惡毒氣注息則能為雨
為霧灑諸毒蟲周徧身體注味則能為膿為血種種
雜穢注觸則能為畜為鬼為糞為屎注意則能為電
為雹摧碎心魄三者輿報招引惡果此輿業交則臨
終時先見毒氣充塞遠近亡者神識從地涌出入無
間獄發明二相一者通聞被諸惡氣熏極心擾二者
塞聞氣掩不通悶絕於地如是輿氣衝息則能為質
為履衝見則能為火為炬衝聽則能為沒為溺為洋
為沸衝味則能為餒為爽衝觸則能為綻為爛為大
肉山有百千眼無量呌食衝思則能為灰為瘴為飛

砂礮擊碎身體四者味報招引惡果此味業交則臨
終時先見鐵網猛燄熾烈周覆世界亡者神識下透
挂網倒懸其頭入無間獄發明二相一者吸氣結成
寒水凍裂身肉二者吐氣飛為猛火焦爛骨髓如是
嘗味歷嘗則能為承為忍歷見則能為然金石歷聽
則能為利兵刃歷息則能為大鐵籠彌覆國土歷觸
則能為弓為箭為弩為射歷思則能為飛熱鐵從空
雨下五者觸報招引惡果此觸業交則臨終時先見
大山四面來合無復出路亡者神識見大鐵城火蛇
火狗虎狼師子牛頭獄卒馬頭羅刹手執鎗稍驅入

城門向無間獄發明二相一者合觸合山逼體骨肉
血潰二者離觸刀劍觸身心肝屠裂如是合觸歷觸
則能為道為觀為廳為案歷見則能為燒為焚歷聽
則能為撞為擊為傳為射歷息則能為括為袋為考
為縛歷嘗則能為耕為鉗為斬為截歷思則能為墜
為飛為煎為炙六者思報招引惡果此思業交則臨
終時先見惡風吹壞國土亡者神識被吹上空旋落
乘風墮無間獄發明二相一者不覺迷極則狂奔走
不息二者不迷覺知則苦無量煎燒痛深難忍如是
邪思結思則能為方為所結見則能為鑒為證結聽

則能爲大合石爲氷爲霜爲土爲霧結息則能爲大火車火船火檻結嘗則能爲大叫喚爲悔爲泣結觸則能爲大爲小爲一日中萬生萬死爲偃爲仰阿難是各地獄十因六果皆是衆生迷妄所造若諸衆生惡業同造入阿鼻獄受無量苦經無量劫六根各造及彼所作蕪境蕪根是人則入八無間獄身口意三作殺盜姪是人則入十八地獄三業不蕪中間或爲一殺一盜是人則入三十六地獄見見一根單犯一業是人則入一百八地獄由是衆生別作別造於世界中人同分地妄想發生非本來有

補曰此一段文意以前後次序反覆研覈於訟習不能藏影句下脫二習等四字於見報如是見火句下脫燒見能爲等八字似非譯人之簡畧殆書工之闕遺也既失稽考於一時遂乃滑疑於千載深爲之歎息問曰淨覺曰諸根循業各變難盡消會如聞報調注見則能爲雷爲吼豈是眼根所入之相況下文多此類聖言叵測惟博通之士昭示來學今此意可得聞乎曰愚固非博通者試爲子言之夫如來說法不苟然也其敘六根始則標定受報之業如招引惡果此見業交等文是也次則

示業報之相如燒聽能爲鑊湯洋銅等文是也而六根注發互相酬業與易陰中有陽陽中有陰流變無異故見報以火言之聞報以水言之易則以离爲目坎爲耳故於見聞之間則曰燒曰注至其敘六報於見則曰燒心於聞則曰注意餘四但曰衝思歷思結思而已不曰心意者蓋亦以心爲火以意爲水思是意之業也故前文謂意如幽室見幽室見者沈潛之象則復以爲水也宜矣而見報曰燒聽能爲鑊湯洋銅者如易离在地爲火在天爲日坎中有离故有温泉有火井离中有坎故有

火鼠火龜謂聽屬耳耳屬坎而見報之离火變於耳根之坎水故也燒息能爲黑烟紫談者如易艮卦九三厲爲熏心程頤以爲熏灼其心也謂息屬鼻鼻屬艮而見報之离火變於鼻根之艮土故也燒味能爲鐵丸鐵糜者如易兌四九爲金离二七爲火又乾爲金离爲火煨之銳戈兵火金相合則煨而爲丸融而爲糜謂味屬口舌口舌屬兌而見報之离火變於舌根之兌金故也燒觸能爲熱灰爐炭者如易坤爲金金有範金者有合土者其象有腹有耳無足是皆自坤變也坤离皆有木象黃

帝書曰在天爲風在地爲木今焚薪爲炭枯枿成
灰离火動而薪止火滅而燼留謂觸屬身身屬坤
而見報之离火變於身根之坤土故也燒心能爲
星火煽鼓空界者如易心位在坎离之間也邵雍
曰离爲星而張衡以星辰爲地之精氣上變乎天
星日之餘辰月之餘月生於日日所照臨衆星被
耀因水轉光至精斲氣歇坎極离現則乃有飛殞
之象謂心屬坎离而見報之离火復變於心位之
离火與坎水故也聞報注聞則爲責爲詰者如易
离坎艮爲無敢折獄又爲刑殺等義謂聞屬耳耳

屬坎而聞報之坎水變於耳根之坎水與艮土离
火故也注見則能爲雷爲吼者如易离火與巽風
也木中有火風者火氣之動也离爲目動爲多白
眼觀眼之變則可以知風火故迅雷所轟烈燄爍
金驚飈奮發萬竅怒號謂見屬眼目眼目屬离而
聞報之坎水變於眼根之离火與震木巽風故也
注息則能爲雨爲霧者如易兌爲口艮爲鼻口鼻
通氣山澤通也水氣上蒸而爲雲爲霧謂息屬鼻
鼻屬艮而聞報之坎水變於鼻根之艮土與兌金
故也注味則能爲膿爲血者如易坎爲血既濟曰

坎上東隣殺牛歸妹曰兌上到羊無血謂味屬口
舌口舌屬坎兌而聞報之坎水變於舌根之兌金
坎水故也注觸則能為畜為鬼為糞為尿者如易
艮卦曰坤為身坎為鬼坤土也坎水也土陷于水
中故為泥為塗睽卦曰見豕負塗載鬼一車惡其
穢之甚也謂觸屬身身屬坤而聞報之坎水變於
身根之坤土與坎水故也注意則能為電為電摧
碎心魄者如易習坎重坎也今聞報之坎水復注
于意之坎水乃以坎而入坎蓋意在坎离之間坎
离以中相易坎極成离火光起於洲潭巨焚生於

積油坎北方之卦沍陰之地也离南方之卦積陽
之地也故陽極為電陰極為電說卦為心病為加
憂謂意屬坎离而聞報之坎水復變於耳根之坎
水與离火故也餘準此可見然此業報變現如影
隨形了無差忒實由自安所招非本來有或謂虛
張三世報應妄說六道輪迴者豈足與語易道哉
言為質為履者質與躡同廣雅曰躡踏也言為餒
為爽者通俗文云魚敗曰餒羹敗曰爽

復次阿難是諸衆生非破律儀犯菩薩戒毀佛涅槃
諸餘雜業歷劫燒然後還罪畢受諸鬼形若於本因

貪物爲罪是人罪畢遇物成形名爲怪鬼貪色爲罪
是人罪畢遇風成形名爲魃鬼貪惑爲罪是人罪畢
遇畜成形名爲魅鬼貪恨爲罪是人罪畢遇蟲成形
名爲毒鬼貪憶爲罪是人罪畢遇衰成形名爲癘鬼
貪傲爲罪是人罪畢遇氣成形名爲餓鬼貪罔爲罪
是人罪畢遇幽爲形名爲魘鬼貪明爲罪是人罪畢
遇精爲形名魍魎鬼貪成爲罪是人罪畢遇明爲形
名役使鬼貪黨爲罪是人罪畢遇人爲形名傳送鬼
阿難是人皆以純情墜落業火燒軀上出爲鬼此等
皆是自妄想業之所招引若悟菩提則妙圓明奉無

所有

論曰前文曰十方微塵如來異口同音告阿難言
善哉阿難汝欲識知俱生無明使汝輪轉生死結
根唯汝六根更非他物汝復欲知無上菩提令汝
速證安樂解脫寂靜妙常亦汝六根更非他物嗚
呼六根果何物哉如二十五聖者因之以獲圓通
蓋所謂證安樂解脫者也於六根而悟者如受六
交罪報苦者因之以沈墜蓋所謂輪轉生死結根
者也於六根而迷者嗚呼因迷而有六道因悟而
有二十五圓通豈本來有哉世尊於法華說化城

大通智勝佛國土宮殿謂大光普照徧滿世界勝諸天光而梵天王尋光自東來者西向見佛自西來者東向見佛南北上下四方交相見佛亦如東西者佛體非有方所者也於火宅稱有五百人止住其中鴟梟鵲鷲烏鵲鳩鴿玃蛇蝮蝎蜈蚣蜒蚰守宮百足鼯狸鼯鼠諸惡蟲輩交橫馳走屎尿臭處不淨流溢蟻娘諸虫而集其上於智則言大通於光則言普照於貪瞋癡苦集生死之趣則曰五百人於諸三毒則言諸虫輩及屎尿臭處與十習因六交報以成生死結恨二十五圓通以證安樂

寂靜妙常同意

復次阿難鬼業既盡則情與想二俱成空方於世間與元負人怨對相值身為畜生酬其宿債物怪之鬼物消報盡生於世間多為梟類風魃之鬼風銷報盡生於世間多為咎徵一切異類畜魅之鬼畜死報盡生於世間多為狐類蟲蠱之鬼蠱滅報盡生於世間多於毒類衰癘之鬼衰窮報盡生於世間多為蠅類受氣之鬼氣消報盡生於世間多為食類絲幽之鬼幽銷報盡生於世間多為服類和精之鬼和銷報盡生於世間多為應類明靈之鬼明滅報盡生於世間

多爲休徵一切諸類依人之鬼人亡報盡生於世間
多爲循類阿難是等皆以業火燒枯酬其宿債傍爲
畜生此等亦皆自虛妄業之所招引若悟菩提則此
妄緣本無所有如汝所言寶蓮香等及琉璃王善星
比丘如是惡業本自發明非從天降亦非地出亦非
人與自妄所招還自來受苦提心中皆爲浮虛妄想
疑結復次阿難從是畜生酬償先債若彼酬者分越
所酬此等衆生還復爲人反徵其剩如彼有力兼有
福德則於人中不捨人身酬還彼力若無福者還爲
畜生償彼餘直阿難當知若用錢物或役其力償足

自停如於中間殺彼身命或食其肉如是乃至經微
塵劫相食相誅猶如轉輪互爲高下無有休息除奢
摩他及佛出世不可停寢汝今應知彼梟倫者酬足
復形生人道中參合頑類彼咎徵者酬足復形生人
道中參合愚類彼狐倫者酬足復形生人道中參於
庸類彼毒倫者酬足復形生人道中參合狼類彼蝨
倫者酬足復形生人道中參合微類彼食倫者酬足
復形生人道中參合柔類彼服倫者酬足復形生人
道中參合勞類彼應倫者酬足復形生人道中參於
文類彼休徵者酬足復形生人道中參合明類彼諸

循倫酬足復形生人道中參於達類阿難是等皆以宿債畢酬復形人道皆無始來業計顛倒相生相殺不遇如來不聞正法於塵勞中法爾輪轉此輩名爲可憐愍者

論曰以十習因受六交報生地獄中徧嘗諸苦餘業盡已乃生人趣然爲順後之業而昏荒癡愚有自來矣今所逢所偶不自三塗之至者幾希天竺僧號耆域者以晉惠時至襄陽欲渡漢江舟人以其胡沙門弊陋者不上眼業不載至北岸而域已往舟人眩莫測始異之路有兩虎域以手按一虎

頭又頓足趨一虎曰叱叱於是虎皆背去所至小兒譁隨之入洛陽諸比丘爲作禮域危坐受之謂人曰此方僧萬數獨指支法淵曰此菩薩從竿中來又指竺法興曰此菩薩從天中來又曰比丘衣服皆華飾違法制非佛意也望見宮室曰大畧似忉利天但彼是道力所及此特衆生淨業力成耳謂沙門耆闍密曰匠此宮闕者從忉利天來成已卽還天上屋脊瓦下應有作具迹之果有千五百器耆域聖者也而洛陽萬僧中指兩人而一人猶旁生來嗚呼今可整心慮趣菩提乎 補曰集解

以參合猥類次於狐倫之下。又以參合庸類次於
毒倫之下。愚嘗以受諸鬼形身爲畜類。還復爲人
等文歷商之。則知其爲錯綜也。夫狐倫者得非起
於所謂多爲狐類乎。多爲狐類得非起於所謂貪
欲爲罪乎。毒倫者得非起於所謂多爲毒類乎。多
爲毒類得非起於所謂貪恨爲罪乎。故狐倫當以
庸類綴之。而毒倫當以猥類綴之。信有自矣。

阿難復有從人不依正覺。修三摩地。別修妄念。存想
固形。遊於山林。人不及處。有十種仙。阿難彼諸衆生
堅固服餌而不休息。食道圓成名。地行仙。堅固草木
而不休息。藥道圓成名。飛行仙。堅固金石而不休息。
化道圓成名。遊行仙。堅固動止而不休息。氣精圓成
名。空行仙。堅固津液而不休息。潤德圓成名。天行仙。
堅固精色而不休息。吸粹圓成名。通行仙。堅固呪禁
而不休息。術法圓成名。道行仙。堅固思念而不休息。
思憶圓成名。照行仙。堅固交遘而不休息。感應圓成
名。精行仙。堅固變化而不休息。覺悟圓成名。絕行仙。
阿難是等皆於人中鍊心。不修正覺。別得生理。壽千
萬歲。休止深山。或大海島。絕於人境。斯亦輪迴妄想
流轉。不修三昧。報盡還來。散入諸趣。

論曰。徧入三塗。復爲人類。當求超出。乃不遇正法。而別修妄術者。圓覺曰。衆生不能入清淨覺。非覺。違拒。諸能入者。非覺入。故。故曰。斯亦輪迴妄想。流轉不修。三昧報盡。還來散入諸趣也。

阿難。諸世間人。不求常住。未能捨諸妻妾恩愛。於邪姪中。心不流逸。澄瑩生明。命終之後。鄰於日月。如是一類。名四天王。天於已妻房姪。愛微薄。於淨居時。不得全味。命終之後。超日月明。居人間頂。如是一類。名忉利天。逢欲暫交。去無思憶。於人間世。動少靜多。命終之後。於虛空中。朗然安住。日月光明。上照不及。是

諸人等。自有光明。如是一類。名須臾摩天。一切時靜。有應觸來。未能違戾。命終之後。上升精微。不接下界。諸人天境。乃至劫壞。三災不及。如是一類。名兜率陀天。我無欲心。應汝行事。於橫陳時。味如嚼蠟。命終之後。生越化地。如是一類。名樂變化天。無世間心。同世行事。於行事交。了然超越。命終之後。徧能出超。化無化境。如是一類。名他化自在天。阿難。如是六天形。雖出動。心迹尚交。自此已還。名爲欲界。

論曰。四天王天。鄰於日月者。居須彌山之半腹。出海四萬由旬。日月自其宮前繞旋。以照四天之下。

自其上以至忉利天尚四萬由旬蓋帝釋所居之處山之頂也其四隅各八天共三十二天而帝釋主之談摩天此云善時分即空居之初天也日月所不能上照以蓮華開合知時分耳兜率陀天此云知足又說喜足又云妙足過三禪乃無三災於此又言三災不及者盡此一劫無三災耳彌勒菩薩居此天蓋過去未來諸聖者後得智所變之宮也故三災不及然凡夫以福感而生此天者以劫火亦能壞之也樂變化天者有所受用隨念而至非如下之諸天衣食假自化也他化自在天者所須受用又不思而至也除樂變化天他化自在天無嫁娶事一切欲界衆天無有處女胎藏者四天王衆天於父母肩上或懷中如五歲小兒欻然化出忉利天三十三天如六歲時分天如七歲知足天如八歲樂變化天如九歲他化自在天如十歲以是觀之如諸天於姪機微薄分等差故於其生也力用長少如此世尊於此特言之非苟然也問曰於橫陳時何義也曰女子裸形時也司馬相如好色賦曰花容自獻玉體橫陳譯者用此土美詞緣飾吾聖人之意耳補曰兜率陀又云觀史多

卽欲界第四天乃無漏報上所成是爲別報天也。此天有內院外院總五十重每一重有五百億天宮內則四十有九外則一也。彌勒菩薩所處大摩尼殿居其中焉。此殿亦名善法堂。牢度跋提神之所造。上生經曰。佛告優波離。若我住世一小劫中。廣說一生補處菩薩報應及十善果不能窮盡。又曰。今此天主名曰彌勒者是已。具三品九類行者。念念發弘誓願得生彼處以無漏力故。三災不及。所言不接下界諸人天境。乃至三災不及者。通敘內外院也。蓋外院由第九品中一分不精進行者。

所生之處。生七日後。彌勒菩薩放光雨花。引入內院。小摩尼殿。尋爲說法。俾發起精進力。故然後引之。令入內院。二院之外。又有業報一天。乃有漏業果所成。是爲總報天也。修十善業者。得生彼處。以有漏果。故三災可壞。是雖俱同第四一天。然以總報望外院。尚若仙凡之隔。況內院乎。言行雖出動心。迹尚交者。此總結六天。雖已超出人世塵寰之境。猶未離欲界。俱舍頌曰。六受欲交抱執手笑視。姪謂四天王。天忉利天則形交。談摩天則勾抱。兜率陀則執手。變化則對笑。他化則相視。而後熱惱。

方息言自此已還名爲欲界者謂自空居四天至地居二天及人世無非欲界所攝蓋四天王天與忉利爲地居談摩兜率等爲空居也

大佛頂如來密因修證了義諸菩薩萬行首楞嚴經合論卷第八

音切

眇匹莫切 樗樞音 枹孚音 餐食音 蒜筭音 韭久音 薤穢音 葵雖音 瑩瑩音

復福音 鈗州音 駿愛音 復伏音 輾碾音 礪同音 薨呼音 頤如音 毅如音

綏浪音 繕善音 炮砲音 郝壑音 躄房音 囹圄音令 柶音本

鉞越音 刺漆音 槲陟音 戕六音 虺許音 鳩直音 鞠菊音 磴對音

蹙子六切 煽扇音 愁茂音 糜武音 餒奴音 稍朔音 俾側音 覈吏音

滑骨音 斲亦音 剡圭音 互互音 魃跋音 鴟癡音 梟鷲音 鵬州音

鷲就音 馳柚音 鼯奚音 狠呼音 綜子音 裸力音

大佛頂如來密因修證了義諸菩薩萬行首楞嚴經
合論卷第九

阿難世間一切所修心人不假禪那無有智慧但能
執身不行姪慾若行若坐想念俱無愛染不生無留
欲界是人應念身為梵侶如是一類名梵衆天欲習
既除離欲心現於諸律儀愛樂隨順是人應時能行
梵德如是一類名梵輔天身心妙圓威儀不缺清淨
禁戒加以明悟是人應時能統梵衆爲大梵王如是
一類名大梵天

補曰道書曰太乙者元一之氣始生於太虛之上

有玉京之天、乃玉京山也。四方各有八天、三十二
帝居之。玉京之上有玉清、上清、太清、三清之天。三
清之上有虛皇十天、元老元尊與天真九皇居之。
無盡曰：內經所謂玉京三十二帝者，豈非佛之須
彌山頂、忉利天乎？虛皇天者，豈非佛之大梵天乎？
內經謂天皇降九氣爲混沌，西天以大梵天爲世
界主。內經所謂三清天者，豈非佛之空居天乎？列
子所謂無極之外無極、無盡之外無盡，豈非佛之
所謂無量無邊、河沙世界乎？若夫大梵天王之上，
陰陽之所不及，其天少光無量光、光音以至於色
究竟天，雖大梵王有所不知。六合之外，孔老亦置
而不論。此釋迦文佛所以超乎無想之外，出乎空
識之表，而謂之不可思議者也。

阿難，此三勝流，一切苦惱所不能逼。雖非正修真三
摩地、清淨心中，諸漏不動，名爲初禪。阿難，其次梵天
統攝梵人，圓滿梵行，澄心不動，寂湛生光，如是一類。
名少光天、光光相然，照曜無盡，映十方界，徧成瑠璃。
如是一類，名無量光天，吸持圓光，成就教體，發化清
淨，應用無盡，如是一類，名光音天。阿難，此三勝流，一
切憂懸所不能逼。雖非正修真三摩地、清淨心中，麤

漏已伏名爲二禪阿難如是天人圓光成音披音露
妙發成精行通寂滅樂如是一類名少淨天淨空現
前引發無際身心輕安成寂滅樂如是一類名無量
淨天世界身心一切圓淨淨德成就勝託現前歸寂
滅樂如是一類名徧淨天阿難此三勝流具大隨順
身心安隱得無量樂雖非正修真三摩地安隱心中
歡喜畢具名爲三禪阿難復次天人不逼身心苦因
已盡樂非常住久必壞生苦樂二心俱時頓捨麤重
相滅淨福性生如是一類名福生天捨心圓融勝解
清淨福無遮中得妙隨順窮未來際如是一類名福

愛天阿難從是天中有二岐路若於先心無量淨光
福德圓明修證而住如是一類名廣果天若於先心
雙厭苦樂清研捨心相續不斷圓窮捨道身心俱滅
心慮灰凝經五百劫是人旣以生滅爲因不能發明
不生滅性初半劫滅後半劫生如是一類名無想天
阿難此四勝流一切世間諸苦樂境所不能動雖非
無爲真不動地有所得心功用純熟名爲四禪阿難
此中復有五不還天於下界中九品習氣俱時滅盡
苦樂雙亡下無十居故於捨心衆同分中安立居處
阿難苦樂兩滅聞心不交如是一類名無煩天機括

獨行研交無地。如是一類名無熱天。十方世界妙見
圓澄更無塵象。一切沈垢。如是一類名善見天。精見
現前。阿鑄無礙。如是一類名善現天。究竟羣幾窮色
性性入無邊際。如是一類名色究竟天。阿難。此不還
天。彼諸四禪四位天王。獨有欽聞。不能知見。如今世
間曠野深山。聖道場地。皆阿羅漢所住持。故世間麤
人所不能見。阿難。是十八天。獨行無交。未蓋形累。自
此已還。名爲色界。

論曰。四禪者。一有漏。二無漏。三亦有漏。亦無漏。四
非有漏。非無漏也。俱舍曰。三靜慮各有三。第四靜
慮八者。不分廣果之無想天也。彌勒曰。色界十八
處。謂梵衆天。梵前益天。大梵天。此三由煖中上品
熏修。初靜慮故。少光無量光。極靜光。此三由煖中
上品熏修。第二靜慮故。少淨天無量淨天。遍淨天。
此三由煖中上品熏修。第三靜慮故。無雲天。福生
天。廣果天。此三由煖中上品熏修。第四靜慮故。無
想天。卽廣果天。攝無別處所。復有諸聖住止。不共
五淨居地。謂無煩無熱善見善現及色究竟。由煖
中上上極品熏修。第四靜慮故。彌勒所言。梵前益
天者。此經梵輔天也。又言無雲天者。此經福愛天

也。而於福愛中分二岐路者，敘無想天也。問曰：何名有二岐路？曰：若以直往，則至廣果天；若以迂往，則至無想天。又問：何名廣果？曰：以發心已來，不帶異計，唯修根本四禪，而離下諸地位之染，歷四位而至福愛天，又增勝定，廣果前之福生勝處是也。又問曰：何名無想天？曰：若帶異計六行，伏惑漸厭，漸離而至福愛天，以得捨力，故捨心圓融，不復相續，反窮所捨之法，捨心亦亡，不計身心，故曰身心俱滅。然遂執以爲涅槃心是也。此妄想相也。而以之爲真者，特以第六識暫不行，如冰中之魚，已捨心相，不知微細心，生滅未捨耳。俱舍曰：此天於生死時有異方，其初生也，凡經半劫，乃入無想異熟也。故曰：初半劫滅，及其欲死也，則自無想異熟而出。又經半劫，乃有心相，心相現而後，乃化。故曰：後半劫生，生死之間，四百九十九劫，一向無想，甚矣未那之難離也。以無想定治之，而復在也。闔心不交，則無諍，故名無煩。研交無地，則無摩，故名無熱。有妙見，故名善見。有妙現，故名善現。機括獨行，無待也。研交無地，無對也。陶鑄無礙，能發化也。陶鑄水火而已。精性水也。見性火也。究竟羣幾者，動之

微也。於此究竟窮色性性者，色性空，空性覺，覺則所謂色性性也。若但窮色性，非色究竟也。色空互爲性，故楞伽曰：住色究竟天，離諸過失，處於彼成正覺也。

復次阿難，從是有頂色邊際中，其間復有二種歧路。若於捨心發明智慧，慧光圓通，便出塵界，成阿羅漢。入菩薩乘，如是一類，名爲迴心大阿羅漢。若在捨心捨厭成就，覺身爲礙，消礙入空，如是一類，名爲空處。諸漏旣銷，無礙無滅，其中唯留阿賴耶識，全於末那半分微細，如是一類，名爲識處。空色旣亡，識心都滅。

十方寂然，迴無攸往，如是一類，名無所有處。識性不動，以滅窮研，於無盡中，發宣盡性，如存不存，若盡非盡，如是一類，名爲非想非非想處。此等窮空，不盡空理，從不還天聖道窮者，如是一類，名不迴心鈍阿羅漢。若從無想諸外道天窮空，不歸迷漏，無聞便入輪轉阿難，是諸天上各各天人，則是凡夫業果酬答，各盡入輪，彼之天王，卽是菩薩。游三摩提，漸次增進，迴向聖倫，所修行路，阿難，是四空天身心滅盡，定性現前，無業果色。從此逮終，名無色界。此皆不了妙覺明心，積妄發生，妄有三界，中間妄隨七趣，沈溺補特伽。

羅各從其類

論曰無色界天無四種雖無業果色然有定果色
爲色所依故俱舍曰無色界無處所何也曰彌勒
曰無色界有四處所或無處所有情量建立者謂
瞻部洲人身量不定或時高大或時卑小然隨自
肘三肘半量東毘提訶身量決定亦隨自肘三肘
半量身又高大又如東毘提訶如是西瞿耶尼北
拘盧洲身量亦爾轉復增高大四天王衆天身量
如拘盧舍四分之一三十三天身量復增一分帝
釋身量半拘盧舍時分天身量亦半此上一切如

欲天身量當知漸漸各增一分梵衆天身量半踰
繕那梵前益天身量一踰繕那大梵天身量一踰
繕那半少光天身量二踰繕那此上一切餘天身
量各漸倍增除無雲天應知彼天減三繕那又大
那落迦身量不定若作增長極重惡不善業者彼
感身形其量廣大餘則不爾如大那落迦如是寒
那落迦獨一那落迦近邊那落迦旁生餓鬼亦爾
諸非天身量大小如三十三天當知無色界無有
色界故無有身量以彌勒之論知其俱舍可信也
問曰何名復有二種歧路曰於色邊際中若能發

智慧光則不復登空識無所有非想非非想四天
故名迴心大阿羅漢也若但有捨心而已則是樂
定那含故名空處也又問曰何名半分微細全分
末那耶曰阿賴耶第八識也末那第七識也分別
事識第六識也三者相依而有八識之體無同無
異六識之相分麤分細麤則外緣色空等一切諸
法細則內緣賴耶末那兩種耳獨末那行相難辯
雖以執受我相與癡慢愛見相應然推窮之不見
歸宿古師以日中設水器爲喻曰水器是第八識
也日六識也日以器中之水爲緣故壁間浮動之

影影末那也於此言全分末那者此識但內執弗
外緣故半分微細者六識內緣賴耶末那兩種之
細相也如人食芻剥殼而瓜分之視其黃處賴耶
也曰處全分末那也已棄之殼六識外緣色空等
一切諸法之麤相也尚有其微膜其白處半分微
細相又問曰何名如存不存若盡非盡耶曰雖見
識在而不起如存不存也雖見盡而識在若盡非
盡也言非想者識性不動第六麤識想不起故非
非想者雖麤不起第八流注恒不息故又問曰無
身量有壽量乎曰以識所依之報是有法有法必

有終盡故雖名無色界亦有壽量彌勒曰瞻部洲人壽量不定彼人以三十日夜爲一月以十二月爲一歲或於一時壽量百歲或於一時壽量八十歲或於一時壽量漸減乃至十歲東毘訶提人壽量決定二百五十歲西瞿耶尼人壽量決定五百歲北拘盧洲人壽量決定千歲又人間五十歲是四天王衆天一日一夜以此日夜三十日夜爲一月以十二月爲一歲彼諸天衆壽量五百歲人間百歲是三十三天一日一夜以此日夜如前說彼諸天衆壽量千歲如是所餘乃至他化自在天日夜及壽量各增前一倍又四天王衆天滿足壽量是等活大那落迦一日一夜卽以此三十日夜爲一月以十二月爲一歲彼大那落迦壽量五百歲以四天王衆天壽量成等活大那落迦壽量如是以三十三天壽量成黑繩大那落迦壽量以時分天壽量成衆合大那落迦壽量以知足天壽量成號叫大那落迦壽量以化樂天壽量成大號叫大那落迦壽量以他化自在天壽量成燒熟大那落迦壽量應知亦爾極燒熟大那落迦有情壽半中劫無間大那落迦有情壽一中劫非天壽量如三

十三天旁生餓鬼壽量不定又塞那落迦於大那
落迦次第相望壽量近半應知又近邊那落迦獨
一那落迦受生有情壽量不定梵眾天壽二十中
劫一劫梵前益天壽四十中劫一劫大梵天壽六
十劫中一劫小光天壽八十劫中二劫自此已上
餘色界天壽量相望各漸倍增唯除無雲天當知
彼天壽減三劫空無邊處壽二萬劫識無邊處壽
四萬劫無所有處壽六萬劫非想非非想處壽八
萬劫除此拘盧洲餘一劫處悉有中夭補特伽羅
此云數取趣謂凡夫造善惡業緣或生天趣或墮

三塗取七趣不定故也 補曰寂音所論壽量於
器界成壞劫數增減猶未之盡彼七趣壽量時數
皆以瞻部洲為標準且以住劫中一增一減凡二
十增減言之曰增劫者如瞻部洲人壽異時止年
十歲者生子便倍增至十五歲漸漸倍增至八萬
四千歲故曰增劫曰減劫者如百歲減一歲自八
萬四千歲漸漸減至十歲如是一增一減名一中
劫也又減劫人壽減至二十歲時饑饉劫起經七
年七月七日方滿人於是時起下品厭離心過此
饑饉劫已人壽又減至二十歲時疾病劫起經七

月七日方止人於是時起中品厭離心過此疾病
劫已人壽又減至十歲時刀兵劫起經七日方息
人於是時起上品厭離心過此刀兵劫已是名小
三災劫也此小三災劫但壞有情不壞器世界如
是二十中劫成句謂成器世界也器世界成時先
自上成色界三禪天次第成下至欲界談摩夫此
依空居者故自上而成下也其次先自下風輪次
第成上至忉利天此依地界者故自下而成上也
如是二十中劫成已住句謂世界已成能安住有
情故也此二十住劫每一增劫增至八萬四千歲
時有轉輪王出治于世其減劫於二十減劫中有
千佛出化于世如賢劫中至第九劫有四佛出化
于世減至六萬歲時拘留孫佛出化于世又減至
四萬歲時拘那含牟尼佛出化于世復減至二萬
歲時迦葉佛出化于世至百歲時釋迦牟尼佛出
化于世前八萬劫中無佛出世至第十劫減至八
萬歲時彌勒佛出化于世十一至十四劫亦無佛
出世至第十五劫有九百九十四佛次第出化于
世十六至十九劫亦無佛出世至第二十劫婁至
佛出化于世然此住劫器世界中有千須彌虛千

日月輪千四大洲作一輪圍山其頂高至二禪天
名一小千界千小千界作一輪圍山其頂高至三
禪天名一中千界千中千界作一輪圍山其頂高
至四禪天名一大千界是名三千大千世界總名
娑婆世界是一佛所化之境同一成壞於一四洲
中有一化身故名千百億化身如是二十中劫住
已壞句謂住劫已滿壞劫時至也一火劫其俱生
火起壞至二禪天二水劫其俱生水起壞至三禪
天三風劫其俱生風起壞至四禪天而四禪天不
壞為捨念清淨故是名大三災劫也此大三災劫

但壞器世界不壞有情而有情徙於別界或有福
願及三摩提力者得生四禪天中也如是二十中
劫壞已空句謂器世界已壞空劫時至也空二十
劫時數已復成器世界如是器世界成壞首尾連
環源源不絕故曰成住壞空總八十中劫名一大
劫也

復次阿難是三界中復有四種阿修羅類若於鬼道
以護法力成通入空此阿修羅從郊而生鬼趣所攝
若於天中降德貶墜其所卜居隣於日月此阿修羅
從胎而出人趣所攝有修羅王執持世界力洞無畏

能與梵王及天帝釋四天爭權此阿修羅因變化有
天趣所攝阿難別有一分下劣修羅生大海心沈水
穴口且遊虛空暮歸水宿此阿修羅因濕氣有畜生
趣攝阿難如是地獄餓鬼畜生人及神仙天暨修羅
精研七趣皆是昏沈諸有爲相妄想受生妄想隨業
於妙圓明無作本心皆如空華元無所著但一虛妄
更無根緒阿難此等衆生不識本心受此輪迴經無
量劫不得真淨皆由隨順殺盜姪故反此三種又則
出生無殺盜姪有名鬼倫無名天趣有無相傾起輪
迴性若得妙發三摩提者則妙常寂有無二無無二
亦滅尚無不殺不偷不姪云何更隨殺盜姪事阿難
不斷三業各各有私因各各私衆私同分非無定處
自妄發生生妄無因無可尋究汝勗修行欲得菩提
要除三惑不盡三惑縱得神通皆是世間有爲功用
習氣不滅落於魔道雖欲除妄倍加虛僞如來說爲
可哀憐者汝妄自造非菩提咎作是說者名爲正說
若他說者卽魔王說

補曰諸師所判流通分未見定論者或指第八卷
文殊問名後爲流通或指第九卷七趣後爲二種
流通或指第十卷阿難若復有人後爲流通夫若

以問名後爲流通者阿難何得躡前妙明妙心而
起七趣之問乎若以七趣後爲二種流通者如來
何特於此流通行門乎按經始自阿難殷勤啓請
妙奢摩他三摩禪那最初方便以至如來謂阿難
曰汝雖強記但益多聞於奢摩他微密觀照心猶
未了遂於將罷法座之後復告大眾及阿難曰汝
猶未識修奢摩他毘婆舍那微細塵事原始要終
不出修奢摩陀三摩禪那觀行之言由是而知問
名已後俱爲正宗直至若復有人下方屬流通也
問曰何謂有名鬼倫無名天趣曰隨順殺盜姪是

有句故淪墮於四惡趣鬼倫其一也反此三種不
隨順殺盜姪是無句故出生三善趣天趣其一也
蓋舉一例諸以定七趣之所自耳然四惡三善中
三業所犯亦有兼不兼之謂善惡雖異輪迴則一
故有無相傾流轉七趣無有休息若能妙發三摩
提者尚不存無二之心況隨順殺盜姪事哉阿修
羅義見第五卷福備衆生下

卽時如來將罷法座於師子牀攬七寶几廻紫金山
普告大眾及阿難言汝等有學緣覺聲聞
菩提無上妙覺吾今已說真修行法

修奢摩他毘婆舍那微細魔事魔境現前
汝不能識洗心非正落於邪見或汝陰魔或復天魔
或著鬼神或遭魘魅心中不明認賊為子

補云前文已嘗開顯陰濁之相狀而未詳敘眾魔
之次序今重出之俾學者安住禪那不為勝妙之
境所移則眾魔不戰而自屈此實成佛之大旨也
自古義學之師多以通經大畧為能事不以進修
三昧為要訣遂判為流通矣吾宗明悟之士多亦
醉心於微辯之文不能怡神於精研之域於三決
定義失其嚴奉故觸境遇緣為魔所折困惜哉陰

有五種者能蓋覆真性滋發無明揔妄想為其原
也故色陰以堅固為妄想受陰以虛明為妄想想
陰以融通為妄想行陰以幽隱為妄知識陰以罔
象虛無顛倒為妄想於奢摩他中不明諸魔所入
如認賊為子故曰洗心非正

又復於中得少為足如第四禪無聞比丘妄言證聖
天報已畢衰相現前謗阿羅漢身遭後有墮阿鼻獄
汝應諦聽吾今為汝子細分別阿難起立并其會中
同有學者歡喜頂禮伏聽慈誨佛告阿難及諸大眾
有漏世界十二類生本覺妙明覺圓心體

亦無二無別也

迷理為咎癡愛發生

然徧迷故有空性化迷不息有世界生則此十方
微塵國土非無漏者皆是迷頑妄想安立當知虛空
生汝心內猶如片雲點太清裏況諸世界在虛空耶
汝等一人發真歸元此十方空皆悉消殞云何空中
所有國土而不振裂汝輩修禪飾三摩地十方菩薩
及諸無漏大阿羅漢精通澹當處湛然一切魔王
及與鬼神諸凡夫天見其宮殿無故崩裂大地振坼
水陸飛騰無不驚懼凡夫昏暗不覺遷訛彼等咸得
五種神通唯除漏盡戀此塵勞如何令汝摧裂其處

